

四庫全書

集部

欽定四庫全書

集部

純白齋類稿卷十一  
五

詳校官編修<sub>臣</sub>翟槐

中書<sub>臣</sub>劉源溥覆勘

總校官進士<sub>臣</sub>繆琪

校對官中書<sub>臣</sub>王家賓

謄錄監生<sub>臣</sub>朱學濂

欽定四庫全書

純白齋類稿卷十一

元 胡助 撰

七言律詩

將山

鍾阜龍蟠自古今  
寶公塔畔足幽尋  
穿雲碧溜寒聲細  
夾道蒼髯古意深  
千載有懷窮澗壑  
幾人無愧老山林  
齊梁遺跡多無沒  
聊把閑愁入醉吟

寄古學兄

東望南徐即故鄉  
寒壇困坐晝初長  
池塘有夢生春草  
風雨何時對夜牀  
空巷燕歸迎客語  
廢宮花發惱人香  
登臨曾有書來約  
綠淨秦淮正可航

金山寺

浮槎乘興到金山  
樓閣耽耽極偉觀  
吞海江光明法界  
過淮帆影落僧闌  
青銅摩月秋偏早  
白雪翻空夏亦寒  
長嘯天風來萬里  
登臨無復泣南冠

送張鵬飛僉事福建

冰壺玉節氣英英正快扶搖九萬程攬轡慨然新臬事  
埋輪藉甚舊家聲瘴雲暮捲三山碧閩海秋澄一道清  
風采從茲殊俗震老榕陰裏遍巡行

次韻楊友直遊茅山

雨過三茅翠滴衣冰壺高士入山時翻思塵世千年事  
未了仙家一局棋寶劍飛空丹化久秋雲滿地鶴歸遲  
洞門不鎖天壇靜鳳管時將月下吹

送趙伯升江東照磨

風憲用儒吾道盛蕭然琴鶴是行裝昔聞洛水羅溫石  
今見鐘山起趙楊十載黃塵烏帽影一朝冰鏡玉壺光  
公閑笑傲宣城上疊嶂雙溪入錦囊

送鳳山講主歸天竺

道人說法寶花零照夜摩尼濁水澄衲惹天香辭玉陛  
錫飛空影過金陵譯經三藏見真性衣錦萬迴真異能  
我亦從來世緣淺願參巾履躡峻嶒

古學兄自京口至蔣生教授自廬州至不期而

會是夕大雪

家山何在久飄蓬  
兀坐寒齋歲又窮  
兄弟舅甥千里隔  
江湖風雪一宵同  
舉觴痛飲消愁外  
秉燭相看似夢中  
明日不堪回首處  
孤雲依舊在江東

春雪

膏雨纖纖長麥苗  
翻成六出舞春宵  
模糊柳眼輕難積  
點綴花房暖易消  
雲暝長途隨馬去  
風迴虛幌逐人飄  
臘前賦瑞連牀樂  
此夕寒齋始寂寥

玉晨觀

三茅山下玉晨觀陶許玄風古道場  
仙檜千年閱晉宋丹泉二井分陰陽  
烟浮石鼎窓紗碧雲護靈壇秋葉黃  
過客徘徊不能去殘碑斷碣滿長廊

虎丘寺

闔閭荒塚鹿麋遊化作蓮宮跨碧湫  
海氣潜通龍躍劍金精秘泄虎蹲丘  
陰風颯颯雙崖古白日寥寥萬木秋  
說法道人無復見空餘羣石卧山頭



畫山水

浮空積翠弄烟霞能事丹青屬意賒野水碧澄涵釣艇  
秋林黃落見人家豈無倦客思萸菜亦有閒官採菊花  
真似坐餘巖壑裏不知漂泊在京華

和袁伯長韻送繼學伯庸赴上都四首

紫薇朝雨濕臙脂玉署深深弱柳垂書法謹嚴當載筆  
家聲睦奕在論思瀛洲易縱青冥靶人世難酬白雪詞  
扈蹕年年九天上微涼殿閣載賡時

江海詞源正瀾漫南屏老翠幾回看花驄蹴踏雪消盡  
宮錦淋漓酒吸乾鸞掖承恩揮寶札駝峰沾賜出冰盤  
英才得展當年治誰說冷官魚上竿

清暑宮衣疊雪脂上京雨露故多垂人間炎赫無因到  
天上高寒有所思內府舊傳延對策教坊新被雅歌詞  
由來勲業須青鬢二妙風流擅一時

居庸關外陰漫漫異景蕭條拄笏看沙草低風泉韻咽  
嶺雲開日露華乾天閑風臆三千匹世路羊腸百八盤

想見玉堂多盛集宿醒睡起日三竿

次韻楊友直偶作

萬事紛紛歸去休採山釣水即良謀青衫不直田園樂  
白屋那關時世憂壯志奈何成濩落殘年如此愧淹留  
會當共駕牛車去却泛春江樹杪舟

和間閒真人悼鶴

胎禽住世不知年真逸成功獨爾憐華表留聲終解化  
浮丘相法豈虛傳舊乘羽服空軒蓋新葬銘章有墓田

惆悵碧牕觀易罷祇騎一隻上寥天

和道心姪遣興

高人自得丘園趣何用腰金束九環宿雨乾時耕白水  
春雲香處劖青山東林淨社形骸外西洛耆英伯仲間  
記取清明時節好相逢莫教酒盃閒

赴美化書院別親友

遍叅名勝走黃埃俛仰京華一夢回此日東書遊美化  
當時薦稿上清臺羶寒但得無迎送地近何妨數往來

自笑半生成渡落猶期教育見英才

送董仲禮赴察院

三策淵源濟世才  
簡書嚴肅震風雷  
分司歷遍東西浙  
貢剡還升內外臺  
八詠溪雲愁易別  
半山松月候重來  
交遊衮衮登清要  
誰憶寒儒困草萊

遊小赤壁

釣磯仿佛壘西邊  
遙想英雄一慨然  
崖谷空鐫小赤壁  
文章誰續老坡仙  
落星久化山頭石  
孤月長懸水底天

此夕舟遊殊勝絕惜無佳句與人傳

新試院

宰臣屬意構鄉闈繪事翬飛土木奇欲為清朝羅俊士  
豈於華屋計崇賢豐碑外樹陳王道高閣中嚴奉聖師  
會見秋風燈火夕朱衣暗點校文時

西山晚歸

金剝紛紛壓翠巒瘦藤扶我試躋攀清時更覺湖山好  
樂意極知魚鳥閑西浦新鴻秋水外南朝古木夕陽間

逢人為問歸何晚  
笑荅幽尋山竺還

訪孫幹卿州判

元夕持螯酒興濃  
喜君夙昔志英雄  
相思京國十年外  
再會江陰一夢中  
興誦安恬循吏化  
家傳清白古人風  
功名事業從茲始  
不與膏粱筮仕同

效侯良齋諧音一律體贈幹卿

判州儉德似羔羊  
廉幹聲名日播揚  
僵卧獨憐吟夜永  
勝遊同約踏春陽  
賞心雲觀臨江渚  
快意風濤接海洋

今古無窮詩酒興此生隨地得徜徉

多景樓

來往南徐又十秋人逢好景易生愁  
驚心鴻雁飛孤影滿眼江山憶舊遊  
雲淨金焦浮暖玉雪消吳蜀漲春流  
文章未了相如志再駕長風萬里舟

三月廿八日喜雨

久旱山川徧禱祠翠華徐動北巡時  
俄瞻萬里風雲合沛作一天雷雨垂  
爽濯飛埃泥沒馬潤流枯壑水浮龜



輿情歌舞均霑被想見行宮進壽卮

讀文山集

學問淵源見性真志扶傾厦不逢辰少時大策魁多士  
晚節忠風愧幾人亟上封章誅嬖倖肯回直筆媚權臣  
遺文字字英靈氣玉潔珠光萬古新

和李息齋留別南歸

漢廷耆俊愛桐鄉聽唱驪駒抑更揚祖帳都門華轂盛  
歸驂江路白雲長平山楊柳沾衣綠桃塢瓊花入酒香

一代幾人如此老淮南草木有輝光

壯日勤勞徧楚鄉於今歸夢有荆揚名高藝圃承恩重  
貴極傳神閱世長靜几蒲團依白傳暑風竹簟趁黃香  
玉堂回首如天上籬菊江梅共耿光

和張希孟學士拜命不赴四首

人生適意早歸來日日杯觴笑口開雲谷長歌招隱曲  
玉堂空避謫仙才子房素志唯松石仲蔚高居正草萊  
馬上朝雞曾慣聽故應無夢到鸞臺

孤雲野鶴本情親  
詩酒生涯樂更真  
已屬諸公行治道  
獨容老子作閑人  
琴樽夜醉華峰月  
杖履朝吟濟水春  
心與海翁同一靜  
烟波浩蕩白鷗馴

脫却朝衣寧再來  
竹窓松戶傍巖開  
但從林下得幽趣  
不管人間論逸才  
夜雪釣絲西澗玉  
春風屐齒北山萊  
相逢採藥多仙侶  
清嘯時聞月滿臺

勇退孤風孰可親  
笑談吾自變吾真  
百年勝事無多日  
一代高名有幾人  
茶竈棋枰消永夏  
酒瓢詩卷樂餘春

門前客散張羅地  
花落閑庭鳥雀馴

淮安忠武王祠

丞相祠堂又一新  
翬飛金碧輝麒麟  
故郊尚想屯師日  
遺老猶談誤國人  
泥路迎降歸孺子  
江湖失候避元臣  
豐功盛烈英靈在  
廟食千秋福我民

松竹軒

松竹軒開絕世氛  
鉤天九奏靜中聞  
山林獨立蒼髯叟  
冰雪相看直節君  
天矯撐空龍作雨  
叅差鳴玉鳳棲雲

千年化石湏臾事刻遍琅玕古篆文

賀歐陽圭齋除翰林承旨

廬陵居士後來身衡嶽湘潭萬古春江表名流知幾輩  
翰林極品見三人綸言播告金鑾舊史事裁衣玉帶新  
一代宗工方倚注未容艤棹五湖濱

試院和察士安韻

科場得失有神司為國求才孰敢私  
三日文鋒雷動處五星德耀夜深時  
公心明鏡持衡重老眼昏花讀卷遲

桂籍廣寒先已定不由天命却由誰

送王公儼代祠南鎮

天香玉帛禮祠庭原隰皇華候使星  
弭節雲門探禹穴榜舟鏡水訪蘭亭  
梅梁廟古苔衣綠石室書殘草帶青  
應向山陰尋故宅興懷重寫換鵞經

純白齋類稿卷十一

欽定四庫全書

純白齋類稿卷十二

元 胡助 撰

五言排律

壽柳道傳博士二十韻

昌運通神嶽長庚應吉占仙華巍萃萃江浦潤漸漸間  
氣鍾名世奎光燭畫蟾宅心推廣大成德本沉潛魯下  
傳宗遠河東問學兼脩辭精以密稽古博而嚴脫穎非  
常調彈冠詎久淹笑談春入坐吟諷月窺簾考試文不

變分雍教不厭容臺儀有據清廟器無嫌積累培良厚  
操持取其廉銘章隨竹帛諡筆却金縑朝幘收佳譽恩  
波喜沛沾仲秋當吉月湛露沐威炎桂蠹冰盤爽松醪  
壽筭添鸞坡方直上鳩杖未須拈海棗香堪剝蟠桃味  
正甜水蒼新玉佩綳縹舊牙籤旋逼躋華要寧容即退  
恬太平資潤色里閑極榮瞻

壽吳閒宗師

瀛海仙源遠崆峒景運長真人希代出大道翼時康教



雨師門盛宗風祖德光讓流吳子國慶衍益公堂誌祀  
精潛達迎年樂未央太玄由我老永命贊吾皇忠孝承  
殊渥勲庸表異章蓬山遊縹緲弱水濟汪洋華旦開千  
祀崇朝轉一陽羽儀真肅肅霞服偉煌煌清奏聞天上  
黃封酌帝傍龜麟呈瑞簡龍虎衛靈塲瑤圃羣仙集冰  
壺百怪藏大椿齡益茂古樂壽彌昌期棗仍多實蟠桃  
又再當閒閒歸衆妙一一見真常曠劫虛無烝長生道  
德香玄都蕭爽地笙鶴永翱翔

壽馬伯庸學士二十韻

嶽瀆神光降乾坤  
爽氣浮偉人  
驚間出昭代  
獲旁求應  
詔高科始揚庭  
大策優華登  
文翰屬顯擢  
法冠傳天下  
無多士朝端  
第一流  
抗章彈老鳳  
乘興狎輕鷗  
耕釣蟠  
三楚聲名播九州  
高吟淮海月  
清嘯石田秋  
宣室趨前  
席承明厭舊遊  
四人寧避漢二老  
已歸周  
載筆銘鐘鼎  
談經侍冕旒  
青宮資善翊  
黃屋訪洪疇  
桐馬淋袍錦  
團  
龍沃賜甌  
變風回大雅  
稽古耀前脩  
華旦初逢臘  
遐齡

曷計籌俗憐青眼顧恩重赤心投龜息春長好虹光夜  
不收玉堂真學士碧海古瀛洲仙棗香堪剝蟠桃味欲  
偷壽棋齊廣老文統接韓歐

和王治書題商學士山水十韻

盛時宗翰墨學士擅丹青逸興開山水高名仰日星樵  
斤空谷應漁網暮潭腥晴塢雲無迹寒崖樹有靈幽篁  
竒石瘦野蔓怪花馨猿鳥林間見舟車水際停齊梁圖  
作障吳蜀寫為屏萬壑歸深院千峰列廣庭滄波鷗泛

泛空宇雁冥冥遐思巢由輩中藏隱者局

和治書春日臺中獨坐十韻

攬轡獨遲遲清朝百度宜憲網爰自肅危坐若無思封  
事通丹宸吟鞭咏素絲烏棲多好樹鳥弄幾新枝沙軟  
連春草波澄鮮凍漸興懷金馬夕言餞碧鷄時深院花  
陰合閒堦栢影移芹香來燕子水煖出魚兒白日寧虛  
擲青雲不負期甘泉崇報祀應待續周詩

送史秉文助教祠西嶽還家

蜀郡文章古，雖庠聞望嘉。放懷吞七澤，歸夢繞三巴。秘  
祝祈民命，分祠遣使華。孝思寧獨席，恩意許還家。海嶽  
皇威暢，乾坤聖歷遐。銜香辭紫禁，負弩迓青綬。令伯人  
方敬，相如俗漫誇。錦江浮竹葉，玉壘漲桃花。壽筭千年  
會，慈顏八袞加。暑風清劍閣，秋月上褒斜。飛雁河源遠，  
看雲棧道賒。高堂榮祿養，晚節著天涯。

胡安常侍郎父慶壽八十

盛世躋三壽，清心養一元。肖形傳洛會，種德邁于門。安

定新封貴中庸舊望尊菊潭澄夜月藥砌弄朝暾大奎  
齊申呂高風蹈綺園粉榆崇素節橋梓沐皇恩家慶金  
章綯庭趨彩袖翻珍羞嚴日愛旨酒樂春溫水曲扶節  
杖花陰駕小軒何當床下拜同姓古彌敦

元夕王泰政席上賦翦燈

元夕同清賞華燈此是魁玲瓏我鳳閣縹緲疊鸞臺楮  
葉羞雕刻并刀快翦裁水紋多曲折絲縷細縈迴一巧  
由心起千奇應手來紅搖驚舞袖彩散入銜杯雲母長

疑畫冰綃不染埃瑞光明百寶春色映三台玉燭和風  
轉金花午夜開追陪東閣履吟咏愧無才

壽虞伯生學士二十韻

雍國光來裔岷江產世賢朝廷聲夙著館閣望推先學  
問諸儒服文章四海傳楷書誠美甚古篆更蕭然王李  
真齊駕韓歐可比肩持衡歸鎖院進講侍經筵璧水開  
精義蓬山玩秘篇題詩紅藥畔草制紫薇邊竹汗成新  
史芸香入舊編立班金帶重下直彩旌懸厯已三春候

時方二月天長庚開壽域南極祝遐年花院藏烟後蘭  
亭禊事前高明瞻斗漢雅志屬林泉顏渥黃封酒心清  
白社蓮松筠宜晚節龜鶴映華顛真率甘枯澹逍遙屏  
麗妍丹爐同永久鐵杖闢清堅前輩風流在斯文統緒  
延佇看升一品冠絕玉堂仙

劉仲彝御史孝廉

親喪吾自盡營葬族人兼樹柏哀何極居廬制獨嚴夜  
泉臺寂寂春露草纖纖行義還淳古科名舉孝廉青宮



趨簿領白簡肅壬儉汝穎先賢傳遺風尚有瞻

送趙宗吉西祠隴蜀

山川崇代祀有詔遣鄒枚峻極瞻西嶽華文煥上台靈  
光通漢時嘉氣候秦臺望秩精誠達迎年淑景廻函香  
天上至使旆日邊來馬度邛徕坂舟行滙瀨堆劍門垂  
薜荔棧閣長莓苔鳩杖扶商皓班衣舞老萊過家多會  
集駐節少徘徊賦詠誇詞筆登臨騁逸才錦江春雨足  
玉壘暮雲開宣室他時對皇風暢九垓

胡母李孺人挽詩

孝奉尊章久仁施德厚培治家皆懿範教子總英才敬  
對一椿老芽聯五桂開萱春方有喜薤露遽生哀采服  
幾年別衰麻萬里回聞喪淒六館致賻動三台無復跳  
魚出唯應弔鶴來朝聲歌楚些亦足慰泉臺

新城八詠樓呈張毅甫廉使

八詠登臨地荒涼皆久堙溪山千古勝棟宇一朝新起  
廢真奇事觀風得偉人赤松光世裔綉斧映朝紳露井

休文迹星壇婺女鄰前楹峰矗矗西浦水粼粼天遠冥  
鴻羽波澄泳錦鱗闌干危倚徙蟠螭屹橫陳秋落高梧  
影雲埋老樹身參差烏鳥集浩蕩白鷗馴三洞飛仙宅  
雙流合劍津鶴歸華表上羊臥石泉濱片泮恢儒業冰  
壺肅吏塵勲庸銘琬琰壯麗闢荆榛要路多名士清時  
少隱淪川原良可愛林壑美無垠境曠才難盡詩工筆  
有神舉杯邀皓月鼓瑟轉陽春縱目連南極馳心共北  
辰遊觀資治理同樂太平民

和趙可學御史試院紀事十四韻

春闈多士集五日試三場懇懇言爲治拳拳策救荒朝  
曦穿席舍殘雪擁茨牆筆落風飄忽簾垂燭煒煌詞源  
寧有竭露索豈須防胸次精忠白眉間喜色黃溫溫明  
玉質耿耿耀珠光對卷翻硃墨凝眸老雪霜縱橫周禮  
樂馳騁漢文章側席求賢俊安民化善良仁恩推廣大  
景運極延長宗伯持金鑑歐公擅玉堂考文流電彩執  
法染天香我后今堯舜垂衣冠百王

送袁雪樵河間治中

漢世三公喬鴻名四海聞衣冠傳典則閥閱聚氤氲秀  
挺當年少才弘更學勤槐花驗秋賦金榜炫朝昕正議  
回鈞軸清風動香芸致身紫薇署拂袖青瑣重南邁遭  
炎瘴北征苦寒靴去思勒民社樂育歌泮芹馬邑古邊  
障雁門今榆粉雪樵清峻極風俗美華勛佐理煩耆彥  
承恩報聖君古瀛近霄漢別駕翔烟雲綠野桑麻合黃  
堂風月分天官資妙畫桂子播清芬趨召金臺上還歸

潞水漬成均念同舍翰長叙斯文

王致道母壽七十

嶽神騰瑞靄婺女耀寒芒生子非凡近榮親是顯揚斷  
機齊孟母躍鯉繼王祥史館明褒貶成均化善良閼宮  
歌實實泮水頌洋洋燕喜開東魯忘憂樹北堂高科儒  
業遠介福壽源長鸞詒天花燦魚軒象服光七旬初度  
日三月正春陽翠釜珍羞味黃封旨酒香聰明如少壯  
步履更輕強姻友歡同會門生秩舉觴遐齡岡萃萃真

節栢蒼蒼五福膺全具兒孫笏滿床

遊赤松宮

真境玄冬際空山靜窈然舊遊如隔世清坐欲通仙蓬  
島虛無地桃園小有天寒雲依竹屋晴雪漲丹泉林影  
日光薄梅花春意先盤桓松鶴外舒嘯石羊邊未暇窺  
龍洞何由訪鹿田山人朝覓句羽士夜談玄

酬和古律詩二十四韻并序

僕歸自京師承子晦翰製惠書兼賀學識超然追古

人而從之殊增降歎日者伏謁辱款盛筵眷意綢繆  
益悅情話且又贈遺古律詩二十四韻大音希聲籠  
光行禮異時中朝諸公見之亦當爲之擊節也輒次  
韻奉荅甚愧續貂幸裁正焉胡助頓首再拜

乾坤森萬象一氣實網維屬此文風盛方當世運熙青  
山玫瑰琰白水照摩尼土樂吳尊美年荒魯酒醺達才  
猶昔日藏器諒需時瑚璉周宗廟衣冠漢羽儀喜因趨  
燕寢暫得脫塵羈文翰功深著鄉閭德厚施遠懷纔畧



布妙語數相遺燕客華觴集娛親彩服奇乘軒憐野質  
招隱慕幽姿孰謂淹槃澗行看貢禮闈感君崇道義愧  
我拙言辭磨琢資良友溫恭本聖師克勤逾澹泊加禮  
益操持雲軌長虞覆天閑每斤嘶萱堂春意永竹徑歲  
寒期西峴霜空壑南溪雨漲堤古心稽典籍逸興寄園  
池習俗行誇疾隨時論少卑椒盤春獻頌蓮炬夜催詞  
博學端成務愚言敢儆危行藏俱有合用舍孰非宜年  
妙才華富飛騰豈厭遲

純白齋類稿卷十二

欽定四庫全書

純白齋類稿卷十三

元 胡助 撰

五言絕句

白雲

片片白於雪山人共隱居豈無作霖意太空時一舒

石鼓嶺

經過石鼓嶺不見石鼓文兩澗流寒玉半山生白雲

黃秋江耕釣山房十詠

秋江釣月

江月澄秋色垂鉤沙岸邊得魚固可喜無魚亦欣然

空谷耕雲

農事不可緩躬耕以養親隱居雲谷裏老作太平民

蒼峰卓筆

孤峰卓毛錐何啻萬鈞力誰能蘸秋江顛草書空碧

碧巘開屏

神工琢方玉為障紅塵路翠屏生晚寒白鳥忽飛度

楓林巢屋

蕭蕭楓樹林上有仙鶴巢獨宿白雲遠數聲秋月高

雪澗浮龜

激湍浮石龜頑若不知事澗底得高年殊勝江湖使

峻嶺扶車

行險虞傾覆居高慮易非上車挽不進下車去如飛

圓岡揭斗

山脉應天象壁星布圓岡肅容靜相對共北心不忘

雙溪合璧

寶劍千年合山輝神氣通深清環釣石餘潤作年豐

古寺垂虹

空山出清磬蕭寺隱林端掃葉僧歸後夕陽橋影寒

希夷像

肚皮包太極鼻息應黃鐘天下事已定先生睡得濃

山水小畫五首

小山如虎踞大山似龍蟠草堂人已出蕙帳生春寒

春香花泛泛水渺山重重漁艇時來往桃源有路通  
結廬水石會高居把釣人前峰春雨足一派垂天紳  
古寺雲峰頂微茫一徑開時逢林下客興盡抱琴回  
茅棟臨松壑飛流不厭看何勞揮白羽長夏自生寒

劉伶像

一鋪埋身計相隨入醉鄉形骸雖放浪生死未能忘

子昂枯木竹石

幽篁微有韻枯木寒無枝石生方傲兀歲晏以為奇

秋晚小景

茅宇清溪曲秋風老樹疎空中羣雁過知有北來書

蘆雁四詠

飛鳴宿食

肅羽遵寒渚渡江蘆葉黃誰云南去遠不敢過衡陽  
萬里西風急送書時一聲從教驚客夢可待主人烹  
沙汀樓處穩夜漏有奴看月暗蘆花白一身秋夢寒  
飲啄殊自得水田梁稻秋寧因謀一飽去却網羅憂

新涼二首



夜來牕戶涼一枕聽秋雨曉起絕飛埃門前有流水  
雨將殘暑去風送新涼至安得歸夢成夜長愁不寐

勸兄弟十首

田氏好兄弟初焉念少差一朝仍會合荆樹再開花  
鄴下然箕句淮南布粟歌相煎客不得奈爾二人何  
何苦毫釐較當思手足親丁鴻與劉愷讓國是何人  
鴻雁天邊過鵲鷁原上飛尋聲還顧影次序不相違  
父慈子必孝兄友弟須恭倘使誠心在如何不感通

連床聽夜雨長枕共姜衾棣萼相輝映何由外侮侵  
金昆如玉季和樂奏埙篪氣象自然別淳風復古時  
生來同一氣兄弟是天倫祇要長和睦休論富與貧  
友愛言無間從教耳屬垣怡愉從遜讓寬厚福之源  
古有難兄弟今無好弟兄何由風俗厚凡百近人情

越上寶林寺八詠

飛來峰

寶林從何來飛空錫同住天風吹海濤長恐復飛去

應天塔

浮圖成再世業岌高入雲妙應人天果鈴音上界聞

靈鰻井

巖穴如深井潛潤通海脉靈鰻久蜿蜒歲事時有獲

大布衲

清涼大布衲七帝思道德流傳五百年未滅鍼綫迹

羅漢井

應真曾卓錫百尺井泉深汲汲天人供泓澄佛印心

古鐵鉢

鐵鉢生古色曾經飯胡麻黃龍此降服更長碧蓮花

深竹堂

禪宮庭宇靜深翠萬竿竹忽悟瓦礫聲杳嚴道機熟

盤翠軒

獨擅越中秀軒牕四面山紅塵飛不到長共白雲閒

除夕

今年盡今日明日是明年客況蕭條處春寒雪後天

大能仁寺五詠

支遁室

支遁開山祖千年古道場坐看秦望碧門對鏡湖光

玄度檜

許公手親植上有晉苔封應悟無生話蒼然化老龍

天鏡閣

凌虛高閣迥一鑑懸秋空山河與大地盡在光明中

傲雪軒

松竹持高節清香獨讓梅歲寒同傲雪風月更悠哉

見月亭

夜夜見明月殘經可了看半牕橫塔影玉露二更寒

孔子泣麟圖

麟為聖人出聖人為麟泣見獲何不祥春秋成絕筆

布袋和尚

一筇挑布袋萬物此俱收開口嬉嬉笑人生枉自愁

雨水竹

楚雲飛不起翠雨濕低垂南望九嶷遠湘妃泣舜時

畫虎二首

踞坐視耽耽空山將落日一嘯風滿林獸驚不敢出  
橫行負嵎坐風林欲暮天威猛服禽獸孰敢櫻在前

尖帽山

山似高簷帽青尖插晚空何人堪戴取付與筆頭翁

彈琴峽

白石似琴身流水似琴絃阿誰彈此曲遺音千萬年

仙人枕

石作仙人枕枕邊流水聲借君眠一覺神爽到蓬瀛

白海

雲淡青蕪遠風高白海寒君王圍獵處人道近長安

隱趣園八首

君子池

池上藕花開香從太極來亭亭清淨觀君子日徘徊

待月壇



天遠雲歸早山高月上遲夜坐發孤詠秋風生桂枝

蜀錦屏

濯錦為屏障紅妝擁萬妃試看春睡足何羨買臣妻

天香臺

三月韶華盛名花傾國人何期真率會同賞洛陽春

香雪壁

醖醖春意好百尺走條枚壁立堆香雪風流入酒盃

晚香徑

彭澤歸來後東籬菊正黃秋光無限興晚節有餘香

竹澗亭

竹遶茅亭外泉流石澗中一天秋月夜千載隱君風

歲寒亭

松竹如佳士梅花更典刑歲寒千古意笑指鹿峰青

附六言絕句

稽鍊師秋山小景二首

緱嶺鳳笙明月茂陵仙掌秋風雲臥楚山飄桂練盡吳

江落楓

林下手招歸鶴水邊目送飛鴻莫道秋山是畫分明身  
在其中

羣魚龜蟹圖二首

羨爾水鄉三物濠梁之樂誰同慎勿橫戈沙上正須曳  
尾泥中

風味獨傾郭索吉凶莫問波臣便當拍浮湖海長作龜  
魚主人

虎溪三笑圖二首

東林一段公案送客不過虎溪今日為誰破戒欣然拍手分携

陸道山靜兀兀陶淵明醉如泥笑殺遠公相送何曾踏著虎溪

北山不老泉

千載有懷慈母一泓不老寒泉欲窮源而莫盡竟坐石以安禪



純白齋類稿卷十三

欽定四庫全書

純白齋類稿卷十四

元 胡助 撰

七言絕句

安山見王繼學侍御

綠安園林杏子熟安山泊船端午時南歸喜見王侍御  
薰風入座談新詩

商學士山水

雨斷雲林濕翠幢漁舟一葉釣清江好山秀水商公筆

付與幽人臥北牕

蘇李祖別圖

持節生還海上身  
酒酣泣盡別愁新  
河梁分手天南北  
千古長憐異域人

羅稚川山水

稚川山水足幽奇  
點綴分明似郭熙  
何事舟人歸意速  
風吹溪雨欲來時

戲詠鶴



白鶴翩躚日日来道人庭宇啄莓苔祇愁煉得丹成後  
騎上青天去不廻

桐江舟中

潮送歸舟過浙東嚴陵灘下一帆風桐江秋色真堪畫  
回首釣臺烟雨

柯敬仲枯木竹石

瀟灑幽篁不受塵千年枯木篆書文揮毫鵬落清新意  
不減湖州古墨君

登舟口號

舉家送我上扁舟一路溪山憶舊遊  
小槳如飛人漸遠無窮離恨懶回頭

用柳道傳韻題天王講主墨梅

妙入毫端老更妍河東向落簡齋邊  
天王祠下春風面時見飛花雨法筵

贈懷空上人

卓錫為庵了上乘高風孤絕護山靈  
我來試叩祖師意

直指芙蓉一朵青

草堂歸來圖

草堂雲水靜含暉  
荆樹花梢掛衲衣  
卓錫有聲慈母喜  
萬回方向北山歸

錢氏孝感紫芝圖

孝子當年泣血時  
蓼莪一詠一回悲  
冰魚冬笋何嗟及  
瑞應猶多見紫芝

東坡書三馬贊真蹟

圖成天馬歸何處  
墨妙辭雄耐久看  
當日儀曹五花判  
他年遷客一忠肝

錢清道中

斜風細雨過西興  
越上山光見未曾  
夜宿錢清愁不寐  
可憐春盡冷如冰

李息齋墨竹

薊丘老息竹傳神  
密葉寒梢不受塵  
相對碧牕風日靜  
嗒然疑是古仙人

戲作東門竹枝詞五首

東門歲晚竹枝歌  
白髮無情奈老何  
古意猶存風俗厚  
南人不似北人多

病卒携筐拾墮薪  
東門稍僻少車塵  
久從叫佛樓邊住  
慣見深眸高鼻人

酒力微微夢易回  
地爐宿火已成灰  
飛霜帶月寒駝吼  
知有氈車直北來

寒林不動靜無風  
小酌瓜薑面輒紅  
晚向東門回首處

西山只在夕陽中

馬通火軟穴居溫不管狂飈縞帶翻  
舊歲闌珊新歲近  
短轅何日出東門

僧元卿御史送米

曝背晴軒柳影疎履穿衣弊且安居  
朝來御史分清俸  
飽飯紅陳讀異書

得家書

老子飄飄出岫雲從教二息自持門  
忽逢驛使平安報

更喜秋來得一孫

送道士楊一可歸儒養母

劒門春老畫啼鵑負米還家草太玄若識孔時無異趣  
人間孝子即神仙

墨蘭

翠袖瑤華浥露香所思渺渺在三湘九疑日暮碧雲合  
空谷無人亦自芳

畫猿

長臂黑猿棲就鷲嶺攀藤接果捷於風冷泉亭上僧歸後  
長嘯一聲明月中

鑄橘樓

商嶺老人何處藏結樓賓日攬秋光金烏飛出東海水  
鑄作洞庭千樹黃

郭天錫山水

危峰千仞翠蒼蒼彷彿匡廬有草堂聞道山人徵不起  
紫芝春暖白雲鄉



子昂秋岸牧牛圖

野岸秋風木葉稀  
兩三穀棘度荒陂  
玉堂學士歸田興  
寫出山溪放牧時

懷遠五首

朝披諫書夕遠竄  
詩史誣訕亦南遷  
玉人自昔宜烟瘴  
文采風流今謫仙

中書落筆萬人驚  
海外為文更老成  
若使青氈還舊物  
也知造化忌聲名

停車綠葉暗枕榔  
荔子蕉花取意嘗  
何日賜環誇北客  
西牕剪燭話南荒

醉墨留題發興新  
遐方景勝必因人  
零陵山水聞天下  
亦是當年遇逐臣

起居服食異中原  
瘴海茫茫何處村  
愧我真成翟公客  
不能一往候寒溫

謝饒士悅惠楮衾二首

漂楮為衾雪色鮮  
軟於冬絹煖於綿  
詩人持贈師清儉

穩向寒齋夜獨眠

麥光如練瑩無瑕  
蜀錦湖綾未足誇  
煖入詩脾長熟睡  
夢成踏雪去尋花

朝賀退赴南城試院三首

天子龍飛朝會罷  
郎開貢院到南城  
燕臺桂樹秋風老  
奎壁光芒五夜明

簾外良勞小試官  
棘闌列卒謹防閑  
夜深危坐看騰卷  
蠟炬燒殘筆吏寒

文場戰藝似銜枚學術源源筆下來不負皇家圖治意  
端從鄉荐得人才

題七賢過寒林

踏雪崎嶇有底忙僕夫寒窘度林塘他時張蓋紅塵陌  
却憶黃壚舊酒香

值初度

塵滿衣巾好宦情玉堂閒暇得虛名侍祠太室清宵短  
不記今朝是我生

盧溝南道上三首

彰義門前楊柳陰  
過街塔畔井泉深  
行人飲馬向南去  
歷歷穹碑好墓林

柱頭獅子巧雕鏤  
橋下湯湯走濁流  
五月燕山日如火  
寫碑兩度過盧溝

翁仲新阡又一時  
忠奸百世託雄辭  
史官清暇知何補  
奉勅來書賈傅碑

上京紀行見玉泉山下荷花

西山咫尺玉泉清無數藕花香氣生立馬岸邊看不足  
却疑五月到臨平

榆林

倦客出關仍畏暑居庸回首暮雲深青山環合勢雄抱  
不見舊時榆樹林

槍竿嶺二首

九折盤紆過客愁適當載筆扈宸遊長年見說槍竿嶺  
今日身親到上頭

下馬徐徐陟澗岡山風微動十分涼  
桑乾嶺上一回首何處雲飛是故鄉

再賦李老谷

李老谷中聞杜鵑江南遊子不歸田  
利名引得滔滔去竟渡灤河朝日邊

過桓州

陰雲慘淡滿天秋馬上龍鍾擁毳裘  
漸近灤京涼又別斜風細雨過桓州

題望都鋪

坡陀散漫草茸茸地接烏桓古塞風  
仰止神京三十里樓臺縹緲碧雲中

灤陽雜咏十首

帝業龍興復古初穹窿帳幄倚空虛  
年年清暑大安閣巡幸山川太史書

綠闌青草玉花驄馴鹿遊眠殿閣東  
西梵祝釐環地坐瞳矐初日曉旗風



西清學士草黃麻閣老承恩扈翠華昨夜司天臺上望  
文章光燄照龍沙

小西門外草漫漫白露垂珠午未乾沙漠崢嶸車馬道  
半空秋影鐵幡竿

板屋松烟染素衣天街暑雨沒青泥夜來沙磧秋風起  
鳴鏑雲間白雁低

御天門前聞詔書驛馬如飛到大都九州四海服訓誥  
萬年天子固皇圖

斗北高寒無點暑舉頭正見七星文玉堂近與琳宮接  
清夜步虛聲最聞

朝來雨過黑山雲百眼泉生水草新長夏蚊蠅俱掃迹  
葡萄馬湏醉南人

萬迹橐鞬列旆旌周廬嚴肅駕將興帳前月色如霜白  
曉汲灤河窟裏冰

玉堂視草屋三間盡日鰲峰相對閑身遇太平鈴索靜  
題名篆筆又南還

偶題

頭上陰雲如潑墨  
堦前白雨似跳珠  
秋來日日風雷作  
併入灤陽八景圖

宿牛羣頭

蕎麥花開草木枯  
沙頭雨過茁蘑菇  
牧童拾得滿筐子  
賣與行人供晚厨

御花園

朱扉金鎖綠如雲  
雨露恩光草木新  
若識九重臨幸意

花時人世一般春

看雲步虛詞壽吳宗師十首

南極光華世壽昌羽衣滿袖是天香蓬萊殿上神仙客  
長見紅雲擁玉皇

青霄萬里出瓊英神運無方孰可名魯觀朝來書瑞應  
一陽生處即長生

冥冥雲漢鶴飛高密勿真藏豈用勞燕坐空同千百歲  
丹霞萬樹熟蟠桃

真人羽化有還丹  
寓意看雲閑更閑  
舒卷從時皆道妙  
寧分天上與人間

萬象陰陽一氣分  
要從靜處見天君  
太虛同體無疑滯  
始識吾身是白雲

動靜無端長又消  
妙觀元化共逍遙  
文章準易傳千古  
唯有青城一老樵

手招歸鶴同棲處  
目送飛鴻見起時  
幾度塵寰作霖雨  
閑心祇有老天知

山林歸夢是耶非  
海棗如瓜別有期  
看盡浮空千萬態  
不知倚杖立多時

一片閑雲孰與儔  
長空湛碧自周遊  
星移物換人間世  
倒影寒潭萬古秋

雲錦溪山紫翠圍  
仙宮縹緲護玄扉  
林梢片片飛來濕  
知是從龍行雨歸

柯敬中竹石枯木

山石蒼蒼老竹脩  
穢材一派落丹丘  
虛牕晝靜無人到

風動天壇碧玉秋

訪王用亨丹房又題墨梅二首

道人危坐碧牕紗  
客至呼童旋煮茶  
深院日長無一事  
薰風開遍石榴花

京洛相逢塵滿面  
孤山老樹日蕭疎  
何時歸去茅簷底  
瘦影橫牕夜讀書

純白齋類稿卷十四



欽定四庫全書

純白齋類稿卷十五

元 胡助 撰

七言絕句

題宋理宗御札賜王霞後

感國防河事可知  
錢塘綴息強支持  
權臣債帥無庸責  
天命方開混一基

又

穆陵訓敕耿遺珠  
盛世足徵文獻餘  
王守宜登良將傳

孫曾上送史官書

九日同晉卿携酒訪士悅二首

菊花時節蟹螯肥  
風起天街木葉飛  
長記九重重九日  
都人瞻望翠華歸

秋風紗帽客京華  
幾度重陽不在家  
清俸尚堪供一醉  
與君隨意看黃花

題秋粟銀鼠卷

銀鼠何如永某氏  
皮毛如雪秋正肥  
黃粟原頭慣偷食

不知捕作貴人衣

題蔡君謨家書

家問勤勤一紙書  
榻前奏疏此權輿  
直將忠孝貽千古  
不獨聲名輝里閭

又

一節功名耐久看  
奉親報國寸心丹  
當時閩產如公輩  
尚得輸忠作諫官

懷李亭

何人懷李弔仙靈千載春風醉不醒吐出驪珠二十顆  
敬亭山色更青青

祠山張廟

祠山古木庇宮庭傳說埋藏別有靈不見題詩羅處士  
將軍對立鐵衣青

春雨

京城春雨似江南客況蕭條苦不堪又報中臺除目下  
諸公衮衮赴朝參

賀張毅夫右司燕集

階藥老紅春意靜  
牕筠新綠夏陰閑  
西垣燕集刑皆措  
天下安寧似泰山

相府羣英佐治安  
獻酬尊俎樂餘閑  
留司整暇時延佇  
太液波涵萬歲山

折枝來禽

寫生沙果似妖姝  
映日紅腮霧露餘  
想見江南此時景  
薰風池館正臨書

聽松樓

小樓月白奏笙簫  
數樹長松倚碧霄  
夜半忽驚風雨至  
不須更聽浙江潮

江鄉捕魚圖

蒼崖老樹日蕭蕭  
一片秋光水動搖  
漁父滿罾頭似雪  
兒孫歡喜白魚跳

又詠

中原文物說金人  
二百年間墨尚新  
何限江湖漁者樂

至今展卷動朝紳

遊李氏園

小舫清遊一日閑  
涼亭高處倚闌干  
西湖前面孤山後  
水態雲容不厭看

湖山堂

綠樹殘紅夏氣清  
湖山樓觀雨初晴  
水雲陰裡笙歌起  
多少遊人醉太平

六一泉

湖上興懷二百年文章太守玉堂仙  
我來醉倚長松下  
三酌孤山六一泉

過瓜洲

去年六月過瓜洲今夏還來此繫舟  
堪笑在家能幾日  
一來一往白人頭

羅稚川雪景

獨釣寒江似凍蠅五樓千古挂枯藤  
山陰道上無行迹  
林外人家雪滿罍



赤壁圖

扁舟赤壁興飄然  
白露橫江水接天  
三國英雄渺何許  
千秋風月屬坡仙

又

山高月小水聲聞  
二客從遊酒易醺  
孤鶴橫江夜將半  
羽衣入夢揖子言

湖學感興四首

斯文行世古猶今  
安定先生教育深  
湖學四齋天下式

先將經義淑人心

經殘教弛尚虛文風俗何由使再淳  
進德明明貴天爵豈圖溫飽似庸人

漢唐殘刻有餘妍文定雄辭百世傳  
明善固非求墨妙蔡奸蘓節自昭然

芹香茗水碧於藍六籍醇醲味正酣  
格物工夫精治事莫教俗吏笑清談

戲呈黃晉卿博士

壁水西廳國子師天街遇雨獨歸遲  
豈知不與朝叅者  
正是微吟睡足時

望仙都

清溪白石樹扶疎  
山骨蒼蒼潤不枯  
無數花流春水出  
行人指點近仙都

嶺上脩然一柱筇  
千巖萬壑縉雲東  
洞天可望不可到  
石笋峨峨春雨中

過馮公嶺

披雲橋上馮公嶺借問何由嶺姓馮人道馮公有遺愛  
故將危嶺號馮公

又題馮公嶺

肩輿咿嘍盡圖間峭壁攢峰碧玉環上到嶺頭一回首  
不知身歷萬重山

追和洞賓留題玄妙觀蕉池二首

山房不見道人回池上蕉花幾度開午夜雲歸秋月白  
題詩好待我重来

一氣元為萬物胎誰將混沌鑿分開斷崖水石幽深處  
時有仙人自去來

車上

山川奇氣子長文今日輿圖古未聞行盡河流上車去  
北來喜見索駝羣

九日書寓居壁

隨寓書齋也自奇主家種菊似東籬黃花爛熳西風冷  
時向牕前得一窺

又詠

破帽颺颺老孟嘉  
驚逢重九客京華  
故園今日知誰賞  
却傍人門看菊花

持們德爾丞相斷碑石二首

昔見忠賢鑄黨籍  
通聞奸相立勲碑  
雷霆震擊分邪正  
唯有蒼天不可欺

立馬東風感慨生  
桑田無定幾枯榮  
權門回首如冰冷  
春草離離斷石橫

眉庵為伯生賦三首

正色騰騰結喜緣  
庵中老子即蓬仙  
長毫垂雪如羅漢  
小住人間五百年

腳踏實來應不皺  
眼生花後却成攢  
乾坤清趣無人賞  
山月半輪江影寒

取名廉甚道函三  
居上無功或爾慚  
千古文章宗蜀郡  
眉山今日屬眉庵

班姬題扇

漢苑秋風太液波承恩多處怨還多欲將心事書紈扇  
時有炎涼可奈何

徐孝子

刲股頻頻母疾瘳徐生孝行與神謀聖人垂訓雖殊此  
叔世聞風寔少儔

鷺鷥野景

溪壑心情白雪衣聯拳靜立柳陰微魚蝦啄盡江南岸  
却上青天自在飛



寒齋漫成二首

曠野蕭條河水邊  
小齋獨坐對殘編  
去年憐我山居索  
今此山居更可憐

月影橫窓寒雁鳴  
孤眠客子苦為情  
夜寒酒醒夢顛倒  
或在家山或在京

漫興二首

冷官蕭散獨徘徊  
歲晏無錢買酒杯  
非索薦章須廩粟  
年年銅印不曾開

大風纔定掃塵埃  
糴米長鬚久未回  
怪得敲門聲頗亟  
不知恰有貴人來

瓊花

碧樹瓊英護赤闌  
仙姿綽約怯春寒  
揚州風物猶堪畫  
后土祠前幾度看

題涿州驛

秋闌再闌喜文明  
猶記河南舊驛程  
慚愧白頭留滯客  
又從東魯試諸生

題崔鷗龍圖家傳二首

是非顛倒指忠邪  
章蔡登庸理國家  
向使公言真見用  
兩宮未必狩龍沙

龍圖直氣邁朱雲  
回首東都陷塞塵  
南渡百年文物盛  
似茲章疏幾何人

南歸舟中雜興七首

青青河畔野花開  
獨飲香醪一兩杯  
枕上有時春夢覺  
遙望天際櫓聲來

十年不改舊官名幾度南歸又北征  
史館重來頭更白  
翰林風月有餘清

紅杏園林草漸青牛羊駝馬亂沙汀  
舟行飽飯魚羹美  
落日風吹野水腥

快意風帆去路遙水聲浩浩似江濤  
五更歸夢錢塘上  
睡起不知春日高

連日南風送北舡南船索挽不能前  
一朝也解北風轉  
說與南船莫怨天

臨水消愁看落花  
賸拚一月到金華  
故山歸日應初夏  
綠樹濃陰有幾家

雙飛白鷺過沙頭  
隔岸人家草樹幽  
歸向江南花落盡  
一蓬烟雨載春愁

初度口號

今年初度喜還家  
滿眼兒孫笑語譁  
白髮難酬恩罔極  
明年依舊在京華

用王玉成韻題鮮于伯幾五郡紀行詩二首

古錦奚囊曉出關春歸綠野有餘閑老農不識皇華使  
按轡來看海上山

幾迴下馬扣柴關坐石題詩意自閑明越天台溫處道  
白雲流水萬重山

瓊花

素質冰綃映碧空天香夜染蕊珠宮此花不比凡花謝  
春盡仍歸閬苑中

題泮東徐原明甫山水圖

秋老石根松籟鳴溪橋林澗少人行水寒不見垂綸者  
惟有歸舟載月明



純白齋類稿卷十五



# 欽定四庫全書

集部

純白齋類稿卷十六  
八

詳校官編修<sub>臣</sub>翟槐

中書<sub>臣</sub>劉源溥覆勘

總校官進士<sub>臣</sub>繆琪

校對官中書<sub>臣</sub>王家賓

膳錄監生<sub>臣</sub>朱學濂

欽定四庫全書

純白齋類稿卷十六

元 胡助 撰

七言絕句

元旦即事二首

再入詞林兩度春  
衣冠元會物華新  
青衫皓首江南客  
亦是彤庭班末人

新年佳氣滿皇州  
南雁回來春水流  
白髮史官幾七十  
上章告老覓歸舟

墨雨竹

江浦涓涓雨葉垂兩竿倚玉鳳棲枝天寒翠袖春風澁  
恰似湘妃泣舜時

寓舍偶題二首

華軒清暑思從容朝市山林蟻夢同深蒼絕無車馬到  
午牕一枕綠槐風

僦得幽居慰客情槐陰滿地暑風清見人抱甕沽蔬圃  
却得歸田賦未成

宿貢泰甫書齋二首

歲晚天寒共一觴  
書齋留宿話文章  
懸知二妙連床樂  
翰苑瀛州日月長

京華幾載托交深  
白髮蕭蕭已滿簪  
永夜書囊談未了  
擁衾彷彿夢雲林

夏日寓僧房有感三首

鶴姿豈必愛乘軒  
觸械寧容老灌園  
聞道朝端求治切  
江南民瘼可能言

涼生塔院竹風吹老翠摩空峴色奇午睡覺來成獨坐  
時看一卷柳州詩

然竹煮茶消永日解衣坐石受清風一塵不動天機寂  
萬法何歸覺性空

正月三日王仲能載酒同飲湖山堂二首

鳳沼新春休沐日省郎邀我作遨頭也知北客三年仕  
不及西湖半日遊

小舫清尊早過湖湖山堂上興何如洞簫吹徹歌聲緩

春雪微微點翠裾

過陵州

御河漾漾木蘭舟  
春盡飛花送客愁  
何事驅馳南又北  
三年三度過陵州

初度遊西山

水樹涼生五月秋  
河邊駐馬看龍舟  
幾年初度京華客  
今日西山特地遊

溪山過雨圖

從意元暉伯仲間諸峰過雨白雲閑江南林谷真如此  
中有高人不出山

暮冬感懷

京城風雪歲將徂廩粟朝朝換酒壺附火鴟蹲身懶動  
豈堪弄筆畫胡蘆

又題

朝家寔錄幾回編尸素長慚費俸錢莫把文章脩舊史  
恐妨歸老臥林泉

初度偶題

加我三年七十人，劬勞思報志空勤。  
行抽手板歸田里，遠碧山中有白雲。

良鄉道中

秋雨泥途有底忙，考文三度過良鄉。  
燕南自古多奇士，拔取宏才作棟梁。

過涿州

歸騎翩翩似水流，泥乾路穩更無憂。  
愧予忝薦中原士，



幾度西風過涿州

水仙花

南浦飛雲洛水神  
凌波微步不生塵  
梅兄蓀弟雖同趣  
一種風流別是春

沃青閣

南塔前頭高閣上  
山光渾似沃州青  
夜來飛雨穿牕入  
翠濕華嚴一卷經

追和荊公留題龍泉二首

千年神物疑常在一勺寒泉永不乾  
海內青苗自枯槁  
蒼生空望起龍蟠

山石靈源潤不枯清甘為我滌疏麤  
近來莫訝留題少  
曾有金陵一句無

東湖十詠

東湖秋月

東湖者純白老人世家之所居也

明月高懸萬古愁東湖碧水一天秋  
倦遊老子歸來後

夜夜秋光照白頭

巖山蒼翠

巖山者逸老堂南望諸峰是也地理永康俗名十二

巖山多異跡

十二巖巒列翠屏人傳洞壑有仙靈朝雲暮雨尋常事  
萬古巫山一樣青

南浦春流

南浦者純白老人家前之水也其源出大盆山春漲

瀰漫極可觀也

沙邊遙見木蘭舟  
淺渚清波漾白鷗  
三月盆山春水發  
滔天雪浪大江流

禪悅白雲

禪悅者白衣大士道場也  
昔延名僧居之今廢  
昔時老衲滿禪闌  
幾度殘經帶月看  
今日荒涼僧去盡  
水牕空鎖白雲寒

陳庄水亭

陳庄者東陽宅仁氏倉廩也因起小亭臨於池上一  
境可觀

黃雲萬頃覆西疇高臥元龍百尺樓未必催租真敗興  
自緣人物少風流

葛圃花竹

葛圃者界軒先生故居也其孫夢賢善葺理花竹可  
愛

仙翁舊圃藥苗肥竹徑幽深白板扉春酒釀成因醉客

海棠花下倩扶歸

秋堂湖石

秋堂者純白老人從諸孫壽朋之廬也昔買喬氏太湖石運至西園真奇觀也

太湖奇石削崔嵬壯觀秋堂信偉哉米老見之當下拜  
百夫輿自孔山來

秀野沙洲

秀野者純白老人舊園池也盡壞於狂瀾近年水還

故道沙漲復洲今開為田矣

清泉白石化園池沙漲泥淤復舊基  
滄海桑田知幾變故宮禾黍正離離

西丘夕照

西丘者東湖之西小丘塢也自昔農人丘氏世居竹  
籬茅舍鷄鳴犬吠相聞有古風焉

禾黍鷄豚不厭貧耕桑世業古風存  
夕陽掛樹秋光老樵擔參差下白雲

五度朝暉

五度者逸老堂東北望見大山是也不知五度之名  
何說其下居民多富者

大小鬼戎五度峰朝暉夕靄變無窮山紅澗碧人家好  
簫鼓藪祠歲屢豐

子猷訪戴

玉嶂冰溪雪後天扁舟孤詠興飄然當時若見戴安道  
那得風流千古傳



雪牕墨蘭

空山窈窕泣湘靈回首芳洲杜若青  
禪老揮毫真善幻  
光風吹得楚魂醒

古松

庭前挺立歲寒心千尺蒼髯半畝陰  
下有茯苓成琥珀  
臥聽風雨老龍吟

余景山枯木

千年枯木不知春鐵鎖珊瑚古篆文  
前後太陰雷雨黑

老龍蛻骨越江濱

庚寅歲旦

元日春闈已一旬老夫就養客吳門新年七十又三歲  
後飲屠蘇望白雲

隱趣閒步二首

野人生計在桑麻松竹清陰處士家山北山南雪消盡  
後園日日看春花

萬物生生造化功園池佳趣幾人同風輕日暖唐虞世

柳色花香杖履中

純白齋類稿卷十六